



Navoiy sh., Islom Karimov sh.k 77 A

"25" Февраль 2020 у.(г)

г. Навои, пр. Ислама Каримова 77 А

№ К-43

**Ўзбекистон Республикаси Вазирлар  
Маҳкамасининг 2020 йил 20 февралдаги  
"Ташқи реклама бозорини тартибга  
солиш тўғрисида"ги 104-сон қарори  
ижросини таъминлаш тўғрисида**

Тарихий-шаҳарсозлик муҳити ва туманлар (шаҳарлар)нинг мавжуд бинолари меъморий қиёфасини сақлаб қолиш, реклама конструкцияларини ўрнатиш ва улардан фойдаланишни тартибга солишни назорат қилиш, ташқи реклама соҳасининг барча иштирокчилари учун тенг ҳуқуқларни таъминлайдиган тамойиллар ва шартларни шакллантириш мақсадида,

#### **ҚАРОР ҚИЛАМАН:**

1. Ўзбекистон Республикаси Вазирлар Маҳкамасининг 2020 йил 20 февралдаги "Ташқи реклама бозорини тартибга солиш тўғрисида"ги 104-сон қарори ижро учун қабул қилинсин.

2. Вазирлар Маҳкамасининг ушбу қарори билан қуйидагилар:

Ташқи реклама объектларини (конструкцияларини) қуриш тартиби тўғрисидаги низом;

Ташқи реклама объектларини (конструкцияларини) қуриш учун бериладиган ер участкалари, давлат мулки бўлган бино ва иншоотлар рўйхатини шакллантириш тартиби тўғрисидаги низом;

Ташқи реклама объектларини (конструкцияларини) ер участкалари, давлат мулки бўлган бино ва иншоотларда қуриш ҳуқуқини электрон аукцион орқали бериш тартиби тўғрисидаги низом;

Ўрнатилган ташқи реклама объектлари (конструкциялари) учун тўловлар миқдорини аниқлаш тартиби тўғрисидаги низом;

Ташқи реклама объектлари (конструкциялари) хавфсизлигининг умумий техник регламенти тасдиқланганлиги;

шунингдек, қуйидаги тартиб ўрнатилганлиги ва унга мувофиқ:

автомобиль йўлларининг ажратувчи бўлагида, хусусан йўлнинг ёнма-ён жойлашган қатнов қисмларини ажратувчи, транспорт воситалари ҳаракатланиши ёки тўхташи учун мўлжалланмаган, йўл сатҳидан баланд ва (ёки) ётиқ чизиғи билан белгиланган қисмида ҳамда тротуар ва пиёдалар

йўлкаларида, хавфсизлик оролчаларида ташқи реклама объектларини (конструкцияларини) ўрнатиш тақиқланиши, айланма ҳаракатланишли чорраҳалардаги хавфсизлик оролчалари бундан мустасно;

ижобий хулоса фақат жойлаштирилган ташқи реклама объектлари (конструкциялари) ушбу қарор талабларига тўлиқ мос келганда ҳамда улар бўйича тегишли кўрсатмага мувофиқ аввал аниқланган қоидабузарликлар бартараф этилган тақдирда берилиши;

ижобий хулоса Давлат хизматлари марказлари орқали реклама жойининг паспортини олиш учун асос бўлиши;

махсус ишчи гуруҳ аъзолари бериладиган хулосаларнинг қонунийлиги ва ишончлилиги, шунингдек, ташқи реклама объектлари (конструкциялари) паспортлари, гувоҳномалари, рухсатномалари ва ҳуқуқни белгиловчи бошқа ҳужжатларни бекор қилиш тўғрисидаги материалларни ўз вақтида Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларига тақдим этилиши учун шахсан жавобгар эканлиги;

ташқи реклама объектлари (конструкциялари) эгалари махсус ишчи гуруҳларнинг хулосалари ҳамда Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларининг ташқи реклама объектлари (конструкциялари) паспортлари, гувоҳномалари, рухсатномалари ва ҳуқуқни белгиловчи бошқа ҳужжатларни бекор қилиш тўғрисидаги қарорлари юзасидан суд тартибида шикоят бериш ҳуқуқига эга эканлиги;

Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари махсус ишчи гуруҳлар томонидан тузилган хулосалар асосида туманлар (шаҳарлар) ва вилоятлар бўйича ташқи реклама объектларининг (конструкцияларининг) маълумотлар базасини шакллантирилиши;

Ўзбекистон Республикаси Қурилиш вазирлиги Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари томонидан тақдим этилган маълумотлар асосида Ташқи реклама объектларининг (конструкцияларининг) ягона электрон реестрини шакллантирилиши ва ўзининг расмий веб-сайтига жойлаштирилиши маълумот учун қабул қилинсин.

3. Вилоят ҳокимининг ўринбосари (К.Хасанов), туман (шаҳар) ҳокимликлари, вилоят Қурилиш бош бошқармаси (О.Минглиев) билан биргаликда Тошкент шаҳрида ташқи рекламани жойлаштириш соҳасидаги фаолиятнинг алоҳида тартибини амалга ошириш яқунлари бўйича 2021 йил 1 январга қадар бўлган муддатда Вазирлар Маҳкамаси ушбу қарорининг 3-банди нормаларини янада такомиллаштириш юзасидан Вазирлар Маҳкамасига таклифлар киритсин.

#### 4. Туман (шаҳар) ҳокимликлари:

ташқи реклама объектларини (конструкцияларини) қуриш учун бериладиган ер участкаларини ҳамда давлат мулки бўлган бино ва иншоотларни аниқлаш мақсадида ҳудудларни ўрганишни;

ташқи реклама объектларини (конструкцияларини) жойлаштириш учун ер участкасидан фойдаланиш ҳуқуқини, шунингдек, давлат мулки бўлган бино ва иншоотларга реклама объектларини жойлаштириш ҳуқуқини белгилайдиган ҳужжатлар тайёрланишини;

ташқи реклама объектларини (конструкцияларини) тизимли мониторинг қилиш ва уларни ноқонуний жойлаштириш ҳолатларини аниқлашни;

ташқи реклама объектларида (конструкцияларида) жойлаштирилган рекламалар, шу жумладан ижтимоий рекламалар ҳисобини юритишни;

йўлнинг қатнов қисмида жойлашган аҳоли турар-жой биноларининг ташқи қисмида (балкон, лоджия, дераза, эшик ва бошқа тарафига) ҳар қандай турдаги шахсий эълонларни жойлаштирилишига йўл қўймаслик чораларини кўришни;

ушбу соҳада аниқланган қонунбузарлик ҳолатлари бўйича тегишли чора кўриш учун Ўзбекистон Республикаси Монополияга қарши курашиш қўмитасининг ҳудудий бошқармасига таклифлар киритишни таъминласинлар.

5. Туман (шаҳар) ҳокимликлари, вилоят прокуратураси, вилоят ички ишлар бошқармаси, Ўзбекистон Республикаси Монополияга қарши курашиш қўмитасининг вилоят бошқармаси, вилоят маданият бошқармаси, вилоят қурилиш бош бошқармаси, вилоят туризмни ривожлантириш бошқармаси, ташқи реклама операторлари манфаатларини ифода этувчи нодавлат ноижорат ташкилотлари ва бошқа манфаатдор ташкилотлар билан биргаликда:

ўн кун муддатда ҳар бир туман (шаҳар) бўйича махсус ишчи гуруҳлар (кейинги ўринларда махсус ишчи гуруҳлар деб аталади) тузган ҳолда барча турдаги ташқи реклама объектларини (конструкцияларини) Вазирлар Маҳкамасининг ушбу қарори талабларига мувофиқлиги юзасидан хатловдан ўтказишни;

хатлов натижалари бўйича жойлаштирилган ташқи реклама объектларининг (конструкцияларининг) ушбу қарор талабларига мувофиқлиги тўғрисида хулосалар (кейинги ўринларда хулоса деб аталади) берилишини;

Вазирлар Маҳкамасининг ушбу қарори қабул қилингунга қадар қалбакилаштирилган ҳужжатлардан фойдаланилган ҳолда, ташқи реклама объектларига (конструкцияларига) олинган паспортлар, гувоҳномалар, рухсатномалар ва ҳуқуқни белгиловчи бошқа ҳужжатлар, шунингдек тегишли ваколатли органнинг қарорисиз ўрнатилган ташқи реклама объектлари (конструкциялари) ўн календарь кун ичида бекор қилишни;

ташқи реклама объектларини (конструкцияларини) жойлаштириш учун паспортлари, сертификатлари, рухсатномалари ва ҳуқуқни белгиловчи бошқа ҳужжатлари бекор қилинган ёки ушбу ҳужжатлар мавжуд бўлмаган (рухсатсиз ўрнатилган) ташқи реклама объектларини (конструкцияларини) ўттиз календарь кун ичида демонтаж қилиш бўйича зарур чоралар кўришни;

ташқи реклама объектлари (конструкциялари) эгаларига ушбу қарор талабларига жавоб бермайдиган ҳолатларни ушбу қарор қабул қилинган санадан бошлаб олти ой ичида бартараф этиш тўғрисида кўрсатмалар беришни;

бир ой муддатда ишчи гуруҳлар томонидан амалга оширилган ишлар ва вилоят ҳудудида ташқи рекламани жойлаштиришни тартибга солиш бўйича кўрилган чора-тадбирлар натижалари тўғрисида Вазирлар Маҳкамасига батафсил ахборот киритилишини таъминласин.

6. Вилоят ҳокими ўринбосари (К.Хасанов), Ўзбекистон Республикаси Монополияга қарши курашиш қўмитасининг вилоят бошқармаси (А.Мухаммадиев), вилоят телерадиокомпанияси (Х.Қарчиғаев), “Дўстлик байроғи” ва “Знамя дружбы” газеталари таҳририяти ДУК (Б.Пирнафасов) билан биргаликда Вазирлар Маҳкамаси ушбу қарорининг мазмун-моҳиятини оммавий ахборот воситаларида кенг ёритилишини таъминласин.

7. Ушбу қарорнинг бажарилишини назорат қилиш вилоят ҳокимининг ўринбосари К.Хасанов зиммасига юклансин.

Вилоят ҳокими



К.Турсунов